



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

30.06.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի թիվ ԳԲԽ-ԱՄ-2017/11

Հայաստանի Հանրապետության գնումների բողոքարկման խորհուրդը (այսուհետ նաև՝ խորհուրդ), քննելով «ԼՈՒ-ԼԻ-ԼՈՒ» ՍՊԸ-ի կողմից 13.06.2017թ. ներկայացված բողոքը (այսուհետ նաև՝ ԳԲԽ-ԱՄ-2017/11 բողոք) և կից փաստաթղթերը, պարզեց հետևյալը.

1. «ԼՈՒ-ԼԻ-ԼՈՒ» ՍՊԸ-ի ներկայացրած փաստերը, հիմնավորումները և պահանջը

«ԼՈՒ-ԼԻ-ԼՈՒ» ՍՊԸ-ն (այսուհետ նաև՝ Ընկերություն) ՀՀ գնումների բողոքարկման խորհրդին ուղղված 13.06.2017թ. բողոքով հայտնել է, որ ՀՀ պաշտպանության նախարարության կողմից (այսուհետ նաև՝ Պատվիրատու) իրային միջոցների ձեռքբերման նպատակով կազմակերպվել է «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգ (այսուհետ նաև՝ Ընթացակարգ), որին համատեղ գործունեության կարգով (կոնսորցիումով) հայտ է ներկայացրել նաև «ԼՈՒ-ԼԻ-ԼՈՒ» ՍՊԸ-ն:

Ընթացակարգի գնահատող հանձնաժողովի 25.04.2017թ. տեղի ունեցած նիստի՝

- 4.1 կետի համաձայն՝ Ընթացակարգի 1-ին և 2-րդ չափաբաժինների մասով առաջին տեղ զբաղեցրած մասնակից է ճանաչվել «ԼՈՒ-ԼԻ-ԼՈՒ» ՍՊԸ-ն:

- 4.2 կետի համաձայն՝ Ընթացակարգի գնահատող հանձնաժողովը որոշել է առաջին տեղ զբաղեցրած մասնակիցներին առաջարկել ներկայացնելու Ընթացակարգի հրավերով նախատեսված որակավորման չափանիշներին իրենց համապատասխանությունը հավաստող փաստաթղթերը:

Ընթացակարգի գնահատող հանձնաժողովը 06.05.2017թ. ծանուցմամբ հայտնել է հետևյալը.

«ՀՀ ՊՆ կարիքների համար անհրաժեշտ ապրանքների գնման «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգի հրավերի 2-րդ մասի՝ ընթացակարգի հայտը պատրաստելու հրահանգի 3.1 կետով նախատեսված և Ձեր կողմից ներկայացված փաստաթղթերում առկա են անհամապատասխանություններ, մասնավորապես՝

-Ձեր կողմից ներկայացված նմանատիպ պայմանագրի, առևտրային ապրանքագրի թարգմանությունը պետք է վավերացվի նոտարական կարգով և առևտրային ապրանքագիրը պետք է հաստատված լինի երկկողմանի: Միաժամանակ բացակայում է պայմանագրի պատշաճ կատարումը հավաստող փաստաթուղթը:

Հիմք ընդունելով ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 51-րդ կետը՝ անհրաժեշտ է նույն ծանուցումը ստանալուց հետո սահմանված կարգով մեկ աշխատանքային օրվա ընթացքում շտկել անհամապատասխանությունները»:

«ԼՈՒ-ԼԻ-ԼՈՒ» ՍՊԸ-ն սահմանված ժամկետում ներկայացրել է «Հուան Յուան Էլ Տեքնոլոջի Քո» ընկերության և «Ուոնթրավել Ինդաստրի» ԲԲԸ-ի միջև 15.06.2016թ. կնքված թիվ HY-1641048 առուվաճառքի պայմանագրի, թիվ 002195 առևտրային միաբանագրի, «Ուոնթրավել Ինդաստրի» ԲԲԸ-ի կողմից 09.05.2017թ. տրված նամակ-երաշխավորագրի թարգմանությունները, որոնք հաստատված են եղել թարգմանչական և համակարգչային ծառայություններ իրականացնող անհատ ձեռնարկատեր Գայանե Նահապետյանի կողմից:

Ընթացակարգի գնահատող հանձնաժողովի՝ Ընթացակարգի արդյունքներով պայմանագիր կնքելու որոշման մասին հայտարարության համաձայն՝ «ԼՈՒ-ԼԻ-ԼՈՒ» ՍՊԸ-ի հայտը գնահատվել է հրավերի պահանջներին չհամապատասխանող և որպես

անհամապատասխանության համառոտ նկարագրություն նշվել է հետևյալը՝ «սահմանված ժամկետում ներկայացվել է անհամապատասխանությունների շտկում, սակայն հանձնաժողովը չի ընդունել շտկումները, ուստի մերժել է հայտը»:

Ընկերությունը բողոքով վկայակոչել է «Գնումների մասին» ՀՀ օրենքի (այսուհետ նաև՝ Օրենք) 8-րդ հոդվածի 1-ին մասի 8-րդ կետը, որի համաձայն՝ եթե գնման գինը գերազանցում է գնումների բազային միավորը, ապա պատվիրատուն կազմում է գնման ընթացակարգի արձանագրություն: Գնման ընթացակարգի արձանագրությունը գնման ձևին համապատասխան պարունակում է հայտի մերժման դեպքում՝ դրա հիմնավորումը:

Օրենքի 31-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Նույն հոդվածի 5-րդ մասի 2-րդ կետի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում հանձնաժողովը գնահատում է սույն մասի 1-ին կետի համաձայն ներկայացված փաստաթղթերի (տեղեկությունների) համապատասխանությունը հրավերով սահմանված պահանջներին, և, հրավերով սահմանված դեպքերում ու կարգով, գնահատում է տվյալ մասնակցի գնային և ոչ գնային (տեխնիկական) առաջարկի հիմնավորվածությունը:

Կարգի 29-րդ կետի 9-րդ ենթակետի համաձայն՝ գնահատող հանձնաժողովը պատասխանատվություն է կրում իր որոշումների, այդ թվում՝ իր կողմից հաստատված փաստաթղթերի, պահանջների, ինչպես նաև գնման ընթացակարգի հաղթողին որոշելու հիմնավորվածության համար:

* Նույն Կարգի 65-րդ կետի 3-րդ ենթակետի համաձայն՝ առաջին տեղը զբաղեցրած մասնակիցը՝ որպես սույն կետի 1-ին ենթակետով սահմանված որակավորման չափանիշը հիմնավորող փաստաթուղթ, ներկայացնում է նախկինում կատարած պայմանագրի (պայմանագրերի) և դրա հաշիվ-ապրանքագրերի պատճենները, իսկ այդ պայմանագրի պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձնման-

ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Ընթացակարգի հրավերի 2-րդ բաժնի (2. ՄԱՍՆԱԿՑԻ ՄԱՍՆԱԿՑՈՒԹՅԱՆ ԻՐԱՎՈՒՆՔԻ ՊԱՀԱՆՋՆԵՐԸ, ՈՐԱԿԱՎՈՐՄԱՆ ՉԱՓԱՆԻՇՆԵՐԸ և ԴՐԱՆՑ ԳՆԱՀԱՏՄԱՆ ԿԱՐԳԸ) 2.3-րդ կետի 2-րդ ենթակետի համաձայն՝ առաջին տեղը զբաղեցրած մասնակիցը որպես սույն պարբերության 1-ին ենթակետով սահմանված որակավորման չափանիշի հիմնավորող փաստաթուղթ ներկայացնում է նախկինում կատարած պայմանագրի (պայմանագրերի) և դրա հաշիվ-ապրանքագրերի պատճենները, իսկ այդ պայմանագրի պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձնման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Ընթացակարգի գնահատող հանձնաժողովի Ընթացակարգով պայմանագիր կնքելու որոշման մասին հայտարարության համաձայն՝ «ԼՈՒ-ԼԻ-ԼՈՒ» ՍՊԸ-ի հայտը գնահատվել է հրավերի պահանջներին չհամապատասխանող և որպես անհամապատասխանության համառոտ նկարագրություն նշվել է հետևյալը՝ սահմանված ժամկետում ներկայացվել է անհամապատասխանությունների շտկում, սակայն հանձնաժողովը չի ընդունել շտկումներ, ուստի մերժել է հայտը:

Ընկերությունը գտնում է, որ Պատվիրատուի կողմից խախտվել են Օրենքի 8-րդ հոդվածի 1-ին մասի 8-րդ կետով և Կարգի 29-րդ կետի 9-րդ ենթակետով սահմանված պահանջները, քանի որ Օրենքի 8-րդ հոդվածի 1-ին մասի 8-րդ կետը սահմանում է, որ գնման ընթացակարգի արձանագրությունը գնման ձևին համապատասխան հայտի մերժման դեպքում պետք է պարունակեր հայտի մերժման հիմնավորումը, իսկ Կարգի 29-րդ կետի 9-րդ ենթակետը սահմանում է, որ հանձնաժողովը պատասխանատվություն է կրում իր որոշումների հիմնավորվածության համար:

Ընկերությունը գտնում է, որ Ընթացակարգի գնահատող հանձնաժողովը, խախտելով գնումների մասին ՀՀ օրենսդրությամբ սահմանված պահանջները, առանց հայտի մերժման պատշաճ հիմնավորման՝ որոշել է մերժել «ԼՈՒ-ԼԻ-ԼՈՒ» ՍՊԸ-ի հայտը:

Բացի այդ, Ընկերության կողմից սամանված ժամկետում (ինչը վկայում է նաև Ընթացակարգի գնահատող հանձնաժողովը) ներկայացվել է անհամապատասխանությունների շտկում, ինչը ըստ «ԼՈՒ-ԼԻ-ԼՈՒ» ՍՊԸ-ի՝ լիովին բավարար էր Ընկերության հայտը հրավերի պահանջներին համապատասխանող և ընտրված մասնակից ճանաչելու համար:

Ինչ վերաբերում է Ընթացակարգի գնահատող հանձնաժողովի արձանագրած այն անհամապատասխանությանը, որ նմանատիպ պայմանագիրը և առևտրային ապրանքագիրը պետք է վավերացվի նոտարական կարգով, ապա Ընկերությունը բողոքով հայտնել է, որ նման պահանջը խտրական է և հակասում է ինչպես հրավերով, այնպես էլ գնումների մասին ՀՀ օրենսդրությամբ սահմանված պահանջներին: Մասնավորապես, Ընթացակարգի հրավերով չի պահանջվել ներկայացնել նոտարական վավերացմամբ հաստատված թարգմանությամբ փաստաթուղթ, իսկ Ընկերությունը ներկայացրել է պահանջված փաստաթղթերի թարգմանությունները, որոնք հաստատված են եղել թարգմանչական և համակարգչային ծառայություններ իրականացնող անհատ ձեռնարկատեր Գայանե Նահապետյանի կողմից: Այսինքն տվյալ դեպքում Ընթացակարգի գնահատող հանձնաժողովի կողմից Ընկերության հայտի հանդեպ առաջադրվել են հրավերով չնախատեսված պայմաններ, դրա հիման վրա հայտը մերժվել է, որի արդյունքում, ըստ Ընկերության, կոպտորեն խախտվել են Օրենքի 31-րդ հոդվածի պահանջները: Ընթացակարգի հրավերի 2-րդ մասի 3.3-րդ կետի համաձայն՝ միայն հայտում ներառվող բնօրինակ փաստաթղթերի փոխարեն կարող են ներկայացվել դրանց նոտարական կարգով վավերացված օրինակները, մինչդեռ մասնագիտական փորձառությունը հավաստող փաստաթղթերը, ըստ նույն Հրավերի, ներկայացվում են պատճենների տեսքով, ուստի և նոտարական վավերացում չեն պահանջում և Հրավերի 2-րդ մասի 3.3-րդ կետի պահանջները չեն կարող տարածվել պայմանագրի և առևտրային ապրանքագրերի վրա:

Ինչ վերաբերում է Ընթացակարգի գնահատող հանձնաժողովի արձանագրած այն անհամապատասխանությանը, որ առևտրային ապրանքագիրը պետք է հաստատված լինի երկկողմանի, ապա Ընկերությունը նշել է, որ ՀՀ կառավարության 25.08.1998թ. «Ծախսերը հիմնավորող փաստաթղթերի նկատմամբ ներկայացվող պահանջները

սահմանելու և այդ փաստաթղթերի կազմման կարգը հաստատելու մասին» թիվ 525-Ն որոշմամբ հաստատված «Նյութական ու ոչ նյութական ակտիվների, ծառայությունների (աշխատանքների) ձեռքբերման ծախսերը հիմնավորող փաստաթղթերի նկատմամբ ներկայացվող պահանջների սահմանման և այդ փաստաթղթերի կազմման» կարգի 1-ին կետի համաձայն՝ ծախսերի հաշվեգրման համար նյութական և ոչ նյութական ակտիվների, ինչպես նաև ծառայությունների (աշխատանքների) ձեռքբերման ժամանակ իրականացված գործարքները հավաստող փաստաթղթեր կարող են համարվել, մասնավորապես՝

- ա) հարկային հաշիվը.
- բ) հաշիվ-ապրանքագիրը.
- գ) կրճատ հաշիվ-ապրանքագիրը.
- դ) ապրանքանյութական բեռնագիրը.
- ե) պահեստի ելքի անդորրագիրը (ապրանքագիրը).
- զ) կատարողական ակտը.
- է) աշխատավարձի հաշվարկային կամ հաշվարկավճարային տեղեկագիրը.
- ը) քարտային անդորրագիրը.
- թ) բանկային ծառայությունների մատուցումը հավաստող անդորրագիրը կամ քաղվածքը կամ այլ փաստաթուղթ.
- ժ) պետական կամ տեղական ինքնակառավարման մարմինների կողմից տրված՝ վճարների կատարումը հավաստող փաստաթղթերը.
- ժա) հսկիչ-դրամարկղային մեքենայի (<ԴՄ) կտրոնը.
- ժբ) միակողմանի գնման ակտը:

* Նույն կարգի 2-րդ և 3-րդ կետերի համաձայն՝

2. Հաշվարկային փաստաթուղթը հարկ վճարողի իրականացրած գործարքը հաստատող՝ հարկման հիմք հանդիսացող (ծախսերը հիմնավորող) հաշվարկային փաստաթուղթ է, որում արտացոլված են (ներառված են ըստ էության) հետևյալ վավերապայմանները՝

- ա) հաշվարկային փաստաթղթի հերթական համարը և դուրսգրման ամսաթիվը.

բ) ակտիվներ օտարող կամ ծառայություններ մատուցող (աշխատանքներ կատարող) հարկ վճարողի՝

- Հայաստանի Հանրապետության օրենսդրությամբ սահմանված դեպքերում հարկ վճարողի հաշվառման համար (այսուհետ՝ ՀՎՀՀ) ունենալը պարտադիր լինելու դեպքում՝ ՀՎՀՀ,

- իրավաբանական անձի, նրա մշտական հաստատության (այդ թվում՝ հիմնարկի, մասնաճյուղի, ներկայացուցչության) լրիվ անվանումը, փաստացի գործունեության վայրը (հասցեն), և (կամ) ղեկավարի (կամ փոխարինող անձի) պաշտոնը, անունը (անվան սկզբնատառը), ազգանունը, ստորագրությունը,

- ֆիզիկական անձի անունը, ազգանունը, բնակության (հաշվառման) վայրը (հասցեն), ինչպես նաև անձնագրի (զինվորական գրքույկի, սոցիալական քարտի կամ անձը հաստատող այլ փաստաթղթի) սերիան և համարը, իսկ անհատ ձեռնարկատեր լինելու դեպքում՝ նաև «անհատ ձեռնարկատեր» նշումը և պետական գրանցման վկայականի համարը.

գ) ակտիվներ ձեռք բերող կամ ծառայություններ ստացող (աշխատանքներ ընդունող) հարկ վճարողի՝

- Հայաստանի Հանրապետության օրենսդրությամբ սահմանված դեպքերում ՀՎՀՀ ունենալը պարտադիր լինելու դեպքում՝ ՀՎՀՀ,

- իրավաբանական անձի, նրա մշտական հաստատության (այդ թվում՝ հիմնարկի, մասնաճյուղի, ներկայացուցչության) լրիվ անվանումը, փաստացի գործունեության վայրը (հասցեն), և (կամ) ղեկավարի (կամ փոխարինող անձի) պաշտոնը, անունը (անվան սկզբնատառը), ազգանունը, ստորագրությունը,

* - ֆիզիկական անձի անունը, ազգանունը, բնակության (հաշվառման) վայրը (հասցեն), ինչպես նաև անձնագրի (զինվորական գրքույկի, սոցիալական քարտի կամ անձը հաստատող այլ փաստաթղթի) սերիան և համարը, իսկ անհատ ձեռնարկատեր լինելու դեպքում՝ նաև «անհատ ձեռնարկատեր» նշումը և պետական գրանցման վկայականի համարը.

դ) ակտիվների անվանացանկն ու քանակը և (կամ) ծառայությունների տեսակն ու ծավալը,

ե) ակտիվների միավորի գինը՝ դրա առանձնացումը հնարավոր լինելու դեպքում և ընդհանուր արժեքը կամ մատուցվող ծառայությունների սակագինն ու հատուցման ենթակա ընդհանուր գումարը:

3. Սույն կարգի 2-րդ կետի «բ», «գ», «դ» և «ե» ենթակետերի որոշ վավերապայմաններ հաշվարկային փաստաթղթում արտացոլված չլինելու դեպքում այդ ենթակետերի պահանջները համարվում են բավարարված, եթե՝

- առկա է Հայաստանի Հանրապետության օրենսդրությամբ սահմանված կարգով կողմերի միջև կնքված գրավոր պայմանագիր, որում արտացոլված են այդ վավերապայմանները, իսկ հաշվարկային փաստաթղթում առկա է հատուցման ենթակա ընդհանուր գումարը, գործարքն իրականացրած հարկ վճարողների լիազորված անձանց պաշտոնը, անունը (անվան սկզբնատառը), ազգանունն ու ստորագրությունը և կատարված է հղում պայմանագրի ամսաթվին.

- գործարքն իրականացվում է լիազորագրի (տեղեկանքի) հիման վրա (առանց կողմերի միջև գրավոր պայմանագրի կնքման), որում արտացոլված են՝

- ակտիվներ վաճառող (տրամադրող) իրավաբանական անձի (իրավաբանական անձանց հիմնարկների, իրավաբանական անձի մասնաճյուղի կամ ներկայացուցչության) կողմից տրված լիազորագրի (տեղեկանքի) դեպքում՝

- իրավաբանական անձի, նրա մշտական հաստատության (այդ թվում՝ հիմնարկի, մասնաճյուղի, ներկայացուցչության) լրիվ անվանումը, փաստացի գործունեության վայրը (հասցեն), և (կամ) ղեկավարի (կամ փոխարինող անձի) պաշտոնը, անունը (անվան սկզբնատառը), ազգանունը, ստորագրությունը.

- ակտիվներ վաճառող (տրամադրող) ֆիզիկական անձի կողմից տրված լիազորագրի (տեղեկանքի) դեպքում՝

- ֆիզիկական անձի անունը, ազգանունը, բնակության (հաշվառման) վայրը (հասցեն), ինչպես նաև անձնագրի (զինվորական գրքույկի, սոցիալական քարտի կամ անձը հաստատող այլ փաստաթղթի) սերիան և համարը, իսկ անհատ ձեռնարկատեր լինելու դեպքում՝ նաև «անհատ ձեռնարկատեր» նշումը և պետական գրանցման վկայականի համարը.

- ակտիվներ ձեռք բերող (ստացող) իրավաբանական անձի (իրավաբանական անձանց հիմնարկների, իրավաբանական անձի մասնաճյուղի կամ ներկայացուցչության) կողմից տրված լիազորագրի (տեղեկանքի) դեպքում՝

- իրավաբանական անձի, նրա մշտական հաստատության (այդ թվում՝ հիմնարկի, մասնաճյուղի, ներկայացուցչության) լրիվ անվանումը, փաստացի գործունեության վայրը (հասցեն), և (կամ) ղեկավարի (կամ փոխարինող անձի) պաշտոնը, անունը (անվան սկզբնատառը), ազգանունը, ստորագրությունը.

- ակտիվներ ձեռք բերող (ստացող) ֆիզիկական անձի կողմից տրված լիազորագրի (տեղեկանքի) դեպքում՝

- ֆիզիկական անձի անունը, ազգանունը, բնակության (հաշվառման) վայրը (հասցեն), ինչպես նաև անձնագրի (զինվորական գրքույկի, սոցիալական քարտի կամ անձը հաստատող այլ փաստաթղթի) սերիան և համարը, իսկ անհատ ձեռնարկատեր լինելու դեպքում՝ նաև «անհատ ձեռնարկատեր» նշումը և պետական գրանցման վկայականի համարը:

- Կազմվող հաշվարկային փաստաթղթում պարտադիր ներառվում են սույն կարգի 2-րդ կետում նշված մնացած վավերապայմանները, ինչպես նաև հղումը լիազորագրին (տեղեկանքին) և լիազորված ֆիզիկական անձի անունը (անվան սկզբնատառը), ազգանունն ու ստորագրությունը:

Ընկերությունը գտնում է, որ վերոհիշյալ նորմի վերլուծությունից երևում է, որ առևտրային ապրանքագրի երկկողմանի ստորագրված լինելու պահանջ ուղղակիորեն նախատեսված չէ, ավելին, ըստ նույն կարգի 3-րդ կետի, կարգի 2-րդ կետի «բ», «գ», «դ» և «ե» ենթակետերի որոշ վավերապայմաններ հաշվարկային փաստաթղթում արտացոլված չլինելու դեպքում այդ ենթակետերի պահանջները նույնպես համարվում են բավարարված: Ընկերության կողմից Ընթացակարգի գնահատող հանձնաժողովին է ներկայացվել «Ունեթրավել ինդասթրի» ԲԲԸ-ի կողմից 09.05.2017թ. տրված նամակ-երաշխավորագիրը, որը հաստատում է, որ 15.06.2016թ. N HY-1641048 պայմանագրի և N 002195 հաշիվ-ապրանքագրի համաձայն՝ ԲԲԸ-ն գնել է 14 և 16 տեղանոց վրաններ, որոնք եղել են բարձր որակի և մատակարարվել են առանց ուշացումների, ինչը ներկայացված առևտրային

ապրանքագրերի հետ համակցության մեջ ապացուցում են, որ վկայակոչված գործարքը իրականացվել է:

Այսպիսով՝ Ընկերությունը գտնում է, որ Ընթացակարգի գնահատող հանձնաժողովի կողմից խախտվել են Օրենքի 31-րդ հոդվածով սահմանված պահանջները:

Ընկերությունը բողոքով ՀՀ գնումների բողոքարկման խորհրդին խնդրել է՝

1. Կիրառել ժամանակավոր միջոց և կասեցնել ՀՀ պաշտպանության նախարարության կողմից կազմակերպված «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգի գնահատող հանձնաժողովի ցանկացած գործողության իրականացումը, որոշումների կայացումը, որը Խորհրդի կողմից 16.06.2017թ. կայացված միջանկյալ որոշմամբ բավարարվել է:

2. Դադարեցնել ՀՀ պաշտպանության նախարարության կողմից կազմակերպված «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգի գնահատող հանձնաժողովի «ԼՈՒ-ԼԻ-ԼՈՒ» ՍՊԸ-ի հայտը մերժելու մասին որոշումները:

3. Պայմանագիր կնքված լինելու դեպքում՝ «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգը հայտարարել ապօրինի:

Ընկերությունը, պատշաճ ծանուցված լինելով Խորհրդի 16.06.2017թ. ժամը 10:15-ի նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են բողոքով ներկայացված դիրքորոշումը:

2. Հայաստանի Հանրապետության պաշտպանության նախարարության կողմից բողոքի վերաբերյալ ներկայացված փաստերը, հիմնավորումները և դիրքորոշումը.

ՀՀ պաշտպանության նախարարությունը ՀՀ գնումների բողոքարկման խորհրդին ուղղված 23.06.2017թ. թիվ ԴՎԱ/1945 գրությամբ հայտնել է, որ «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով հայտարարված վրանների ձեռքբերման ընթացակարգին համատեղ գործունեության կարգով (կոնսորցիումով) մասնակցության հայտ է ներկայացրել «ԼՈՒ-ԼԻ-ԼՈՒ» ՍՊԸ-ն և 2 չափաբաժինների մասով հայտարարվել է 1-ին տեղ զբաղեցրած մասնակից:

«ԼՈՒ-ԼԻ-ԼՈՒ» ՍՊԸ-ն սահմանված կարգով ներկայացրել է հրավերով նախատեսված որակավորման փաստաթղթերը: Որպես մասնագիտական փորձառության որակավորման չափանիշը հիմնավորող փաստաթղթեր ներկայացվել է «ԼՈՒ-ԼԻ-ԼՈՒ» ՍՊԸ-ի հետ կոնսորցիումով հանդես եկող մեկ այլ արտերկրյա (Չինական) կազմակերպության միջև կնքված մատակարարման պայմանագիր: Պայմանագիրը և կից փաստաթղթերը ներկայացված են եղել անգլերեն և թարգմանված հայերեն: Ընթացակարգի գնահատող հանձնաժողովի անդամների կողմից, մասնակցի ներկայացրած պայմանագրի հավաստիությունը ճշտելու համար, պահանջվել է շտկում՝ ներկայացված փաստաթղթերի թարգմանության հաստատում նոտարական կարգով, համաձայն «Նոտարիատի մասին» ՀՀ օրենքի 36-րդ հոդվածի 1-ին կետի 7-րդ ենթակետի և նույն օրենքի 68-րդ հոդվածի 1-ին կետի պահանջների, ինչպես նաև պայմանագրի կատարումը հավաստող առևտրային ապրանքագրի երկկողմանի վավերացում:

Հիմք ընդունելով Կարգի 51-րդ կետը՝ Ընթացակարգի գնահատող հանձնաժողովը Ընկերությանը ծանուցել է մեկ աշխատանքային օրվա ընթացքում անհամապատասխանությունները շտկելու անհրաժեշտության վերաբերյալ:

«ԼՈՒ-ԼԻ-ԼՈՒ» ՍՊԸ-ի կողմից սահմանված ժամկետում պահանջվող շտկումները չեն ներկայացվել, այլ էլեկտրոնային եղանակով ներկայացվել են մի շարք պատճառաբանություններ՝ շտկումները չներկայացնելու վերաբերյալ:

Գնահատող հանձնաժողովը, հիմք ընդունելով Կարգի 65-րդ կետի 1-ին ենթակետի պահանջները, Ընկերության հայտը մերժել է:

Պատվիրատուն, պատշաճ ծանուցված լինելով Խորհրդի 16.06.2017թ. ժամը 10:15-ի նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են՝ վերոհիշյալ գրությամբ ներկայացված դիրքորոշումը, ինչպես նաև հայտնել, որ Ընթացակարգի գնահատող հանձնաժողովը փորձել է ստուգել Ընկերության կողմից ներկայացված պայմանագրի հավաստիությունը այդ նպատակով դիմելով տարբեր մարմինների, սակայն հաշվի առնելով, որ նշված պայմանագիրը կնքված է երկու արտասահմանյան կազմակերպությունների միջև, ուստի ՀՀ ներպետական որևէ կառույց որևէ տեղեկատվություն չի կարողացել տրամադրել: Ուստի Ընթացակարգի գնահատող

հանձնաժողովը գտել է, որ անհրաժեշտ է պահանջել պայմանագրի նոտարական կարգով վավերացված թարգմանությունը:

3. ԳԲԽ-ԱՄ-2017/11 բողոքի քննության համար էական նշանակություն ունեցող փաստերը

ԳԲԽ-ԱՄ-2017/11 բողոքի քննության համար էական նշանակություն ունեն հետևյալ փաստերը՝

1. Հայաստանի Հանրապետության պաշտպանության նախարարության կողմից ՀՀ պաշտպանության նախարարության կարիքների համար կազմակերպված «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգին մասնակցելու նպատակով «ԼՈՒ-ԼԻ-ԼՈՒ» ՍՊԸ-ի և «Հուան Յուան Էլ Տեքնոլոջի Քո» ՍՊԸ-ի կոնսորցիումն հայտ է ներկայացրել:

2. Կոնսորցիումի հայտի թիվ 3.1 հավելվածով՝ մասնագիտական փորձառության մասին հայտարարությամբ, «Հուան Յուան Էլ Տեքնոլոջի Քո» ՍՊԸ-ն հայտնել և հավաստել է, որ «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով շրջանակային համաձայնագրերի միջոցով գնում կատարելու ընթացակարգի հայտը ներկայացնելու տարվա և դրան նախորդող երեք տարիների ընթացքում պաշտաճ ձևով իրականացրել է Վաճառքի պայմանագիր N ՀԸ-161048 առ 15.06.2016թ., որի ընդհանուր արժեքը կազմել է 72 600 000 ՀՀ դրամ և պարտավորվում է հրավերով սահմանված կարգով ներկայացնել հայտարարությունը հիմնավորող՝ հրավերով նախատեսված փաստաթղթերը:

3. Ընթացակարգի գնահատող հանձնաժողովի 28.03.2017թ. նիստի թիվ 3 տրամադրության 3.1 կետով կայացված որոշմամբ «ԼՈՒ-ԼԻ-ԼՈՒ» ՍՊԸ-ի և «Հուան Յուան Էլ Տեքնոլոջի Քո» ՍՊԸ-ի կոնսորցիումն ճանաչվել է 1-ին տեղ զբաղեցրած մասնակից Ընթացակարգի 1-2-րդ չափաբաժինների մասով և վերջինիս սահմանված կարգով ծանուցվել է հրավերով նախատեսված որակավորման չափանիշները հիմնավորող փաստաթղթերը ներկայացնելու անհրաժեշտության վերաբերյալ:

4. Կոնսորցիումի կողմից, որպես մասնագիտական փորձառության չափանիշը հիմնավորող փաստաթուղթ, Ընթացակարգի գնահատող հանձնաժողովին ներկայացվել է

«Հուան Յուան Էլ Տեքնոլոջի Քո» ընկերության (հասցե՝ 677 Նաթան Ռոադ Մոնգկոկ, Հոնգ Կոնգ) և «Ուոնթերավել ինդասթրի» ԲԲԸ-ի (հասցե՝ NO.1, Յուանշանգայ Ռոադ, Հենգգանգթոու, Սինան շրջան, Չանան Թաուն, քաղաք Դունգուան, Չինաստան) միջև 15.06.2016թ. կնքված 150 232 ԱՄՆ դոլար ընդհանուր արժողությամբ վրանների մատակարարման թիվ HY-161048 պայմանագրի և առևտրային ապրանքագրի՝ անգլերենից հայերեն թարգմանված օրինակները:

5. Ընթացակարգի գնահատող հանձնաժողովի 02.05.2017թ. ժամը 11:00-ի նիստի թիվ 4 արձանագրության 1.1 կետով արձանագրվել է, որ «ԼՈՒ-ԼԻ-ԼՈՒ» ՍՊԸ-ի կողմից ներկայացված որակավորման չափանիշները հիմնավորող փաստաթղթերում առկա են անհամապատասխանություններ, մասնավորապես Ընկերության կողմից ներկայացված նմանատիպ պայմանագրի, առևտրային ապրանքագրի թարգմանությունը պետք է վավերացվի նոտարական կարգով և առևտրային ապրանքագիրը պետք է հաստատված լինի երկկողմանի: Միաժամանակ բացակայում է պայմանագրի պատշաճ կատարումը հավաստող փաստաթուղթը:

6. Հիմք ընդունելով Կարգի 51-րդ կետը՝ Ընթացակարգի գնահատող հանձնաժողովի քարտուղարը 06.05.2017թ. ծանուցել է «ԼՈՒ-ԼԻ-ԼՈՒ» ՍՊԸ-ին՝ առաջարկելով ծանուցումը ստանալուց հետո մեկ աշխատանքային օրվա ընթացքում սահմանված կարգով շտկել անհամապատասխանությունը:

7. «ԼՈՒ-ԼԻ-ԼՈՒ» ՍՊԸ-ի կողմից Ընթացակարգի գնահատող հանձնաժողովին ներկայացվել է «Հուան Յուան Էլ Տեքնոլոջի Քո» ընկերության (հասցե՝ 677 Նաթան Ռոադ Մոնգկոկ, Հոնգ Կոնգ) և «Ուոնթերավել ինդասթրի» ԲԲԸ-ի (հասցե՝ NO.1, Յուանշանգայ Ռոադ, Հենգգանգթոու, Սինան շրջան, Չանան Թաուն, քաղաք Դունգուան, Չինաստան) միջև 15.06.2016թ. կնքված 150 232 ԱՄՆ դոլար ընդհանուր արժողությամբ վրանների մատակարարման թիվ HY-161048 պայմանագրի, առևտրային ապրանքագրի, ինչպես նաև «Ուոնթերավել ինդասթրի» ԲԲԸ-ի կողմից տրված՝ «Հուան Յուան Էլ Տեքնոլոջի Քո» ընկերության կողմից Պայմանագիրը պատշաճ կատարելու վերաբերյալ նամակ-երաշխավորագրի՝ անգլերենից հայերեն թարգմանված օրինակները՝ հաստատված թարգմանչական և համակարգչային ծառայություններ իրականացնող անհատ ձեռնարկատեր Գայանե Նահապետյանի կողմից:

8. Ընթացակարգի գնահատող հանձնաժողովը մերժել է «ԼՈՒ-ԼԻ-ԼՈՒ» ՍՊԸ-ի հայտը՝ պատճառաբանելով, որ սահմանված ժամկետում Ընկերությունը ներկայացրել է անհամապատասխանության շտկումները, սակայն գնահատող հանձնաժողովը մերժել է Ընկերության հայտը, քանի որ Ընկերության կողմից չի ներկայացվել նմանատիպ պայմանագրի, առևտրային ապրանքագրի թարգմանությունը նոտարական վավերացման կարգով և առևտրային ապրանքագիրը հաստատված չի եղել երկկողմանի:

4. Խորհրդի հիմնավորումները և եզրահանգումը

Խորհուրդն, ուսումնասիրելով «ԼՈՒ-ԼԻ-ԼՈՒ» ՍՊԸ-ի 13.06.2017թ. բողոքը, ՀՀ պաշտպանության նախարարության 23.06.2017թ. թիվ ԴՎԱ/1945 գրությունը և կից փաստաթղթերը, հայտնում է հետևյալը.

«Գնումների մասին» ՀՀ օրենքի 5-րդ հոդվածի 3-րդ մասի 2-րդ կետի համաձայն՝ մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝ մասնագիտական փորձառություն:

Օրենքի 8-րդ հոդվածի 1-ին մասի 8-րդ կետի համաձայն՝ եթե գնման գինը գերազանցում է գնումների բազային միավորը, ապա պատվիրատուն կազմում է գնման ընթացակարգի արձանագրություն: Գնման ընթացակարգի արձանագրությունը գնման ձևին համապատասխան պարունակում է՝ հայտի մերժման դեպքում՝ դրա հիմնավորումը:

Օրենքի 31-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Նույն հոդվածի 5-րդ մասը սահմանում է, որ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում՝ առաջին տեղը զբաղեցրած մասնակիցը հանձնաժողովին է ներկայացնում իր՝ գնումներին մասնակցելու իրավունքը և հրավերով նախատեսված որակավորման չափանիշներին

համապատասխանությունը հիմնավորող՝ հրավերով նախատեսված փաստաթղթերը (տեղեկությունները):

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի 65-րդ կետի 1-ին, 3-րդ և 4-րդ ենթակետերի համաձայն՝ մասնակիցների, օրենքի 5-րդ հոդվածի 3-րդ մասի 2-րդ կետով նախատեսված՝ «Մասնագիտական փորձառություն» չափանիշը գնահատվում է հետևյալ կարգով՝

1) հրավերով պահանջվում է, որ մասնակիցը հայտով ներկայացնում է հայտարարություն, որ հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրել է համանման (նմանատիպ) առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների, մատուցված ծառայությունների և կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների, մատուցված ծառայությունների և կատարված աշխատանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի քսան տոկոսից:

2)...».

3) առաջին տեղը զբաղեցրած մասնակիցը՝ որպես սույն կետի 1-ին ենթակետով սահմանված որակավորման չափանիշը հիմնավորող փաստաթուղթ, ներկայացնում է նախկինում կատարած պայմանագրի (պայմանագրերի) և դրա հաշիվ-ապրանքագրերի պատճենները, իսկ այդ պայմանագրի պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձնման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

4) մասնակցի որակավորումը գնահատվում է բավարար, եթե վերջինս ապահովում է սույն կետով նախատեսված պահանջները:

Կարգի 51-րդ կետի համաձայն՝ առաջին տեղը զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացրած որակավորման չափանիշները հիմնավորող՝ հրավերով նախատեսված փաստաթղթերի, իսկ ապրանքների գնման դեպքում նաև սույն կարգի 35-րդ կետի 1-ին ենթակետի «գ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղը զբաղեցրած մասնակցին առաջարկելով մեկ աշխատանքային օրվա ընթացքում շտկել անհամապատասխանությունը:

Նույն Կարգի 52-րդ կետի համաձայն՝ առաջին տեղը զբաղեցրած մասնակցի կողմից արձանագրված անհամապատասխանությունը սահմանված ժամկետում՝

1) շտկելու դեպքում հայտը գնահատվում է բավարար և առաջին տեղը զբաղեցրած մասնակիցը հայտարարվում է ընտրված մասնակից:

2) չշտկելու դեպքում հանձնաժողովի որոշմամբ հայտը մերժվում է և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Կարգի 71-րդ կետի 1-ին ենթակետը սահմանում է, որ գնահատող հանձնաժողովը կարող է ստուգել մասնակցի ներկայացրած տվյալների իսկությունը՝ օգտագործելով պաշտոնական աղբյուրներից ստացված տվյալներ կամ դրա մասին ստանալով իրավասու մարմինների գրավոր եզրակացությունը: Նման հարցում ուղարկվելու դեպքում համապատասխան պետական և տեղական ինքնակառավարման մարմինները հարցումն ժտանալու օրվան հաջորդող երկու աշխատանքային օրվա ընթացքում տրամադրում են գրավոր եզրակացություն: Եթե մասնակցի ներկայացրած տվյալների իսկության ստուգման արդյունքում տվյալները որակվում են իրականությանը չհամապատասխանող, ապա տվյալ մասնակցի հայտը մերժվում է:

Հայաստանի Հանրապետության պաշտպանության նախարարության կողմից կողմից կազմակերպված «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով

ընթացակարգին մասնակցելու նպատակով «ԼՈՒ-ԼԻ-ԼՈՒ» ՍՊԸ-ի և «Հուան Յուան Էլ Տեքնոլոջի Քո» ՍՊԸ-ի կոնսորցիումն հայտ է ներկայացրել:

Կոնսորցիումի հայտի թիվ 3.1 հավելվածով՝ մասնագիտական փորձառության մասին հայտարարությամբ, «Հուան Յուան Էլ Տեքնոլոջի Քո» ՍՊԸ-ն հայտնել և հավաստել է, որ «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով շրջանակային համաձայնագրերի միջոցով գնում կատարելու ընթացակարգի հայտը ներկայացնելու տարվա և դրան նախորդող երեք տարիների ընթացքում պաշտոն ձևով իրականացրել է Վաճառքի պայմանագիր N ՀԸ-161048 առ 15.06.2016թ., որի ընդհանուր արժեքը կազմել է 72 600 000 ՀՀ դրամ և պարտավորվում է հրավերով սահմանված կարգով ներկայացնել հայտարարությունը հիմնավորող՝ հրավերով նախատեսված փաստաթղթերը:

Կոնսորցիումի կողմից, որպես մասնագիտական փորձառության չափանիշը հիմնավորող փաստաթուղթ, Ընթացակարգի գնահատող հանձնաժողովին ներկայացվել է «Հուան Յուան Էլ Տեքնոլոջի Քո» ընկերության (հասցե՝ 677 Նաթան Ռոադ Մոնգոլի, Հոնգ Կոնգ) և «Ուոնթրավել ինդասթրի» ԲԲԸ-ի (հասցե՝ NO.1, Յուանշանգայ Ռոադ, Հենգգանգթոու, Սինան շրջան, Չանան Թաուն, քաղաք Դունգուան, Չինաստան) միջև 15.06.2016թ. կնքված 150 232 ԱՄՆ դոլար ընդհանուր արժողությամբ վրանների մատակարարման թիվ HY-161048 պայմանագրի և առևտրային ապրանքագրի՝ անգլերենից հայերեն թարգմանված օրինակները:

Ընթացակարգի գնահատող հանձնաժողովի 02.05.2017թ. ժամը 11:00-ի նիստի թիվ 4 արձանագրության 1.1 կետով արձանագրվել է, որ «ԼՈՒ-ԼԻ-ԼՈՒ» ՍՊԸ-ի կողմից ներկայացված որակավորման չափանիշները հիմնավորող փաստաթղթերում առկա են անհամապատասխանություններ. մասնավորապես՝ Ընկերության կողմից ներկայացված նմանատիպ պայմանագրի, առևտրային ապրանքագրի թարգմանությունը պետք է վավերացվի նոտարական կարգով և առևտրային ապրանքագիրը պետք է հաստատված լինի երկկողմանի: Միաժամանակ բացակայում է պայմանագրի պատշաճ կատարումը հավաստող փաստաթուղթը: Ուստի Ընթացակարգի գնահատող հանձնաժողովի քարտուղարը ծանուցել է «ԼՈՒ-ԼԻ-ԼՈՒ» ՍՊԸ-ին՝ առաջարկելով ծանուցումը ստանալուց հետո մեկ աշխատանքային օրվա ընթացքում սահմանված կարգով շտկել անհամապատասխանությունը:

«ԼՈՒ-ԼԻ-ԼՈՒ» ՍՊԸ-ի կողմից Ընթացակարգի գնահատող հանձնաժողովին ներկայացվել է «Հուան Յուան Էլ Տեքնոլոջի Քո» ընկերության (հասցե՝ 677 Նաթան Ռոադ Մոնգկոկ, Հոնգ Կոնգ) և «Ուոնթրավել ինդասթրի» ԲԲԸ-ի (հասցե՝ NO.1, Յուանշանգայ Ռոադ, Հենգգանգթոու, Սինան շրջան, Չանան Թաուն, քաղաք Դունգուան, Չինաստան) միջև 15.06.2016թ. կնքված 150 232 ԱՄՆ դոլար ընդհանուր արժողությամբ վրանների մատակարարման թիվ HY-161048 պայմանագրի, առևտրային ապրանքագրի, ինչպես նաև «Ուոնթրավել ինդասթրի» ԲԲԸ-ի կողմից տրված՝ «Հուան Յուան Էլ Տեքնոլոջի Քո» ընկերության կողմից Պայմանագիրը պատշաճ կատարելու վերաբերյալ նամակ-երաշխավորագրի՝ անգլերենից հայերեն թարգմանված օրինակները՝ հաստատված թարգմանչական և համակարգչային ծառայություններ իրականացնող անհատ ձեռնարկատեր Գայանե Նահապետյանի կողմից:

Ընկերությունը Ընթացակարգի գնահատող հանձնաժողովին ուղղված 10.05.2017թ. թիվ 10/17 գրությամբ Ընթացակարգի գնահատող հանձնաժողովին հայտնել է, որ միջազգային առևտրի շրջանակներում արտահանման դեպքում, հաշիվ-ապրանքագրերը չեն հաստատվում երկկողմանի և հանձնման-ընդունման ակտ հասկացողություն կամ նման փաստաթուղթ ևս չի օգտագործվում: Միննույն ժամանակ Ընկերության խնդրանքի հիման վրա Ընկերության գործընկերը տրամադրել է պայմանագրի պատշաճ կատարումը հավաստող տեղեկանք, որը կից ներկայացվել է:

Ինչ վերաբերում է ներկայացված փաստաթղթերի թարգմանության նոտարական վավերացման վերաբերյալ պահանջին, ապա Ընկերությունը հայտնել է, որ դիմել է նոտարական գրասենյակ և ստացել մերժում, քանի որ պահանջվում է այդ փաստաթղթերի բնօրինակները, որպեսզի դրանք ստանան նոտարական վավերացում: Հաշվի առնելով վերոգրյալը, արդեն իսկ իրատեսական չէ մեկ աշխատանքային օրվա ընթացքում ունենալ այդ փաստաթղթերի բնօրինակները և այն վավերացնել նոտարական կարգով, այն դեպքում, երբ ոչ հրավերի, ոչ էլ ՀՀ կառավարության 10.02.2011թ. թիվ 168-Ն որոշմամբ այդպիսի պահանջ չի նախատեսվում:

Նշված գրությամբ Ընկերությունը հայտնել է նաև, որ Ընթացակարգի հրավերով նախատեսված և Ընթացակարգի գնահատող հանձնաժողովին ներկայացված փաստաթղթերը թարգմանվել են նոտարական գրասենյակում գործող, թարգմանչական

ծառայություններ մատուցող թարգմանչի կողմից: Հնարավոր է եղել միայն նշված փաստաթղթերը հաստատել թարգմանչական ծառայություններ մատուցող թարգմանչի կնիքով, որը և վկայում է փաստաթղթերի պատշաճ թարգմանության վերաբերյալ, որոնք կից ներկայացվել են:

Ընթացակարգի գնահատող հանձնաժողովի 02.05.2017թ. ժամը 11:00-ի նիստի թիվ 4 1.1 կետով կայացված որոշմամբ «ԼՈՒ-ԼԻ-ԼՈՒ» ՍՊԸ-ի հայտը մերժվել է:

Խորհուրդը գտնում է, որ մերժելով «ԼՈՒ-ԼԻ-ԼՈՒ» ՍՊԸ-ի հայտը, Ընթացակարգի գնահատող հանձնաժողովը գործել է իրավաչափ, հետևյալ պատճառաբանությամբ.

«Նոտարիատի մասին» ՀՀ օրենքի 36-րդ հոդվածի 1-ին մասի 7-րդ կետի համաձայն՝ նոտարը վավերացնում է փաստաթղթերի թարգմանության իսկությունը: Նույն հոդվածի 1-ին մասի 20-րդ կետի համաձայն՝ նոտարը վավերացնում է իր վստահած թարգմանչի ստորագրության իսկությունը:

Նույն Օրենքի 68-րդ հոդվածի 1-ին մասը սահմանում է, որ նոտարը վավերացնում է փաստաթղթի թարգմանության իսկությունը, եթե նա տիրապետում է համապատասխան լեզուներին: Եթե նա չի տիրապետում համապատասխան լեզուներին, փաստաթուղթը թարգմանում է նոտարի կողմից վստահված թարգմանիչը, որի ստորագրության իսկությունը վավերացնում է նոտարը:

Նույն հոդվածի 2-րդ մասի համաձայն՝ նոտարը, վավերացնելով թարգմանության իսկությունը կամ թարգմանչի ստորագրության իսկությունը, չի հավաստում կամ հաստատում փաստաթղթում շարադրված փաստերը, այլ սոսկ հաստատում է, որ **փաստաթղթի թարգմանության բովանդակությունը համապատասխանում է նրա բնօրինակի բովանդակությանը:**

* Կարգի 71-րդ կետը սահմանում է, որ գնահատող հանձնաժողովը կարող է ստուգել մասնակցի ներկայացրած տվյալների իսկությունը՝ օգտագործելով պաշտոնական աղբյուրներից ստացված տվյալներ կամ դրա մասին ստանալով իրավասու մարմինների գրավոր եզրակացությունը: Նման հարցում ուղարկվելու դեպքում համապատասխան պետական և տեղական ինքնակառավարման մարմինները հարցումն ստանալու օրվան հաջորդող երկու աշխատանքային օրվա ընթացքում տրամադրում են գրավոր եզրակացություն:

Այսպիսով Կարգի վերը նշված կետը ընթացակարգի գնահատող հանձնաժողովին հնարավորություն է տալիս ստուգելու մասնակցի կողմից ներկայացրած տվյալների իսկությունը օգտագործելով պաշտոնական աղբյուրներից ստացված տվյալները կամ համապատասխան պետական և տեղական ինքնակառավարման մարմիններին դիմելու հնարավորությունը: Միևիույն ժամանակ «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգի շրջանակներում «ԼՈՒ-ԼԻ-ԼՈՒ» ՍՊԸ-ի և «Հուան Յուան Էլ Տեքնոլոջի Քո» ընկերության կոնսորցիումի կողմից Ընթացակարգի գնահատող հանձնաժողովին ի սկզբանե ներկայացվել է երկու արտասահմանյան առևտրային կազմակերպությունների՝ տվյալ դեպքում «Հուան Յուան Էլ Տեքնոլոջի Քո» ընկերության (հասցե՝ 677 Նաթան Ռոադ Մոնգկոկ, Հոնգ Կոնգ) և «Ուոնթրավել ինդասթրի» ԲԲԸ-ի (հասցե՝ NO.1, Յուանշանգայ Ռոադ, Հենգգանգթու, Սինան շրջան, Չանան Թաուն, քաղաք Դունգուան, Չինաստան) միջև 15.06.2016թ. կնքված 150 232 ԱՄՆ դոլար ընդհանուր արժողությամբ վրանների մատակարարման թիվ HY-161048 պայմանագիրը և դրան կից առևտրային ապրանքագիրը՝ դրանց հայերեն թարգմանված տարբերակով:

Տվյալ պայմաններում, հաշվի առնելով այն հանգամանքը, որ Ընթացակարգի գնահատող հանձնաժողովը հնարավորություն չի ունեցել Կարգի 71-րդ կետով սահմանված կարգով ներկայացնել համապատասխան հարցումներ, այն պատճառով, որ Ընկերության կողմից ներկայացված պայմանագիրը և առևտրային ապրանքագիրը իրականացվել է երկու օտարերկրյա կազմակերպությունների միջև և Հայաստանի Հանրապետության ներպետական որևէ կառույց օբյեկտիվորեն չի տիրապետում համապատասխան տեղեկատվության պայմանագրի իսկության վերաբերյալ, Ընթացակարգի գնահատող հանձնաժողովը իրավաչափորեն պահանջել է Ընկերությունից ներկայացնել հիշյալ փաստաթղթերի նոտարական կարգով վավերացված հայերեն թարգմանված օրինակները:

Նման իրավիճակում Խորհուրդը գտնում է, որ ներկայացված պայմանագրի և առևտրային ապրանքագրի թարգմանության՝ նոտարական կարգով վավերացված լինելու՝ Ընթացակարգի գնահատող հանձնաժողովի կողմից առաջադրված պահանջն անհրաժեշտ էր դրանց թարգմանված օրինակների՝ բնօրինակ փաստաթղթերի բովանդակությանը համապատասխան լինելու փաստը հավաստելու համար, ինչն

անհրաժեշտ է ներկայացված փաստաթղթերի իսկությունը ստուգելու համար: Մինչդեռ Ընկերության կողմից ներկայացված պամանագրի, առևտրային ապրանքագրի և նամակ-երաշխավորագրի համապատասխան թարգմանությունը իրականացվել է ոչ թե բնօրինակ փաստաթղթից, այլ օգտագործելով դրանց պատճեն տարբերակը և Ընթացակարգի գնահատող հանձնաժողովին ուղղված թիվ 10/17 գրությամբ «ԼՈՒ-ԼԻ-ԼՈՒ» ՍՊԸ-ն հայտնել է, որ նոտարական գրասենյակի կողմից մերժվել է փաստաթղթերի թարգմանությունների նոտարական վավերացումը, քանի որ պահանջվել է այդ փաստաթղթերի բնօրինակները, որոնց Ընկերությունը չի տիրապետում:

Կարգի 70-րդ կետը սահմանում է, որ մասնակիցն իրեն ներկայացված պահանջների համապատասխանության հիմնավորման նպատակով կարող է ներկայացնել լրացուցիչ այլ փաստաթղթեր, տեղեկություններ և նյութեր: Տվյալ պայմաններում Ընթացակարգի գնահատող հանձնաժողովի կողմից Կարգի 71-րդ կետի շրջանակներում առաջադրվել է կոնսորցիումի՝ հրավերով նախատեսված մասնագիտական փորձառության չափանիշին համապատասխանությունը հիմնավորելու պահանջ, որը Խորհուրդը դիտարկում է որպես օբյեկտիվորեն հիմնավորված, հաշվի առնելով Կարգի 71-րդ կետով նախատեսված՝ մասնակցի կողմից ներկայացված տվյալների իսկությունը ստուգելու գնահատող հանձնաժողովի լիազորությունը:

Ինչ վերաբերում է Ընկերության կողմից բողոքով ներկայացված այն պնդմանը, որ Ընթացակարգի գնահատող հանձնաժողովը խախտել է Օրենքի 8-րդ հոդվածի 1-ին մասի 8-րդ կետը, որի համաձայն՝ եթե գնման գինը գերազանցում է գնումների բազային միավորը, ապա պատվիրատուն կազմում է գնման ընթացակարգի արձանագրություն և գնման ընթացակարգի արձանագրությունը գնման ձևին համապատասխան պարունակում է՝ հայտի մերժման դեպքում՝ դրա հիմնավորումը, ապա Խորհուրդը գտնում է, որ Ընթացակարգի գնահատող հանձնաժողովի կողմից պահպանվել են Օրենքի 8-րդ հոդվածի 1-ին մասի 8-րդ կետի պահանջները, քանի որ Ընկերության հայտը մերժելու մասին Ընթացակարգի գնահատող հանձնաժողովի որոշման մեջ հստակ նշվել է հայտի մերժման հիմնավորումը: Մասնավորապես՝ Ընթացակարգի գնահատող հանձնաժողովի 02.05.2017թ. ժամը 11:00-ի նիստի թիվ 4 արձանագրության 1.1 կետով արձանագրվել է, որ «ԼՈՒ-ԼԻ-ԼՈՒ» ՍՊԸ-ն ներկայացրել է անհամապատասխանության շտկումները,

սակայն Ընկերության հայտը մերժվել է այն պատճառով, որ Ընկերության կողմից չի ներկայացվել նմանատիպ պայմանագրի, առևտրային ապրանքագրի թարգմանությունը նոտարական վավերացման կարգով:

Հետևաբար, Խորհուրդն արձանագրում է, որ «ԼՈՒ-ԼԻ-ԼՈՒ» ՍՊԸ-ի հայտը մերժելու մասին Ընթացակարգի գնահատող հանձնաժողովի որոշումը՝ հայտը մերժելու վերաբերյալ դրույթի հետ մեկտեղ պարունակում է նաև մերժման հիմնավորումը, ինչը և պահանջվում է Օրենքի 8-րդ հոդվածի 1-ին մասի 8-րդ կետով:

Այսպիսով, հաշվի առնելով վերոգրյալը, Խորհուրդը գտնում է, որ «ԳԱԿ-ՇՀԱՊՁԲ-ՀՀ ՊՆ ՆՏԱԴ-ՇՀԱՊՁԲ-7/38» ծածկագրով ընթացակարգի գնահատող հանձնաժողովի կողմից պահպանվել են գնումների մասին ՀՀ օրենսդրությամբ սահմանված պահանջները, հետևաբար «ԼՈՒ-ԼԻ-ԼՈՒ» ՍՊԸ-ի կողմից ներկայացված բողոքն անհիմն է և ենթակա է մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասով՝ ՀՀ գնումների բողոքարկման խորհուրդը

Ո Ր Ո Շ Ե Ց

«ԼՈՒ-ԼԻ-ԼՈՒ» ՍՊԸ-ի կողմից 13.06.2017թ. ներկայացված բողոքը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման
խորհրդի անդամ՝



ՄՀԵՐ ԱՆԱՆՅԱՆ